

REGIONAL NEWS

HEADLINES:-

1. Supply department chuan Mizorama raltlan awm mekte hnena athlawna sem tur buhfai chu district hmunpui an thl; n kim tawh
2. Tuna village council leh local council ding laite hun thla 6 vela pawh tawi a inthlanna buatsaih hma turin inpuahchahna kalpui mek a ni.
3. Vawiin khan a vawi 2-na atan vawk thi awm oh ni a thleng leh a, vawk damlo talh a awm loh ni vawi 3-na a ni bawk.
4. Prime Minister Narendra inbumna thil laka kum venghim turin thalaite a ngen.

<><><>

RICE FOR REFUGEES

Food, Civil Supplies & Consumer Affairs (FCS&CA) department chuan Mizorama raltlan awm mek 40,000 chuang hnena a thlawna sem tur buhfai chu district hmunpui an thlen kim tawh.

FCS&CA department hotute hnen atanga Akashvani Aizawl-in thu a dawn danin Ministry of Home Affairs (MHA)-in cheng vaibelchhe 5 a pek atanga Food Corporation of India (FCI) hnen atanga buhfai an lakchhuah hi metric tonne 1,379 leh quintal 30 a ni a. FCI lamin lakchhuah phalna (release order) an pek veleh atanga la chhuak nghalin sorkar laipui hun tiam, ni 60 ral hma a phur chhuakin District 11 hmunpui theuhah thlen tawhin an district bawrhshapte'n home department ruahmanna siam lawk angin a thlawnin an sem chhuak dawn a, thenkhat chuan an sem chhuak mek tawh a ni. Tun hnai a home department-in sorkar laipui hnena raltlan awm zat an thawnah chuan 43,788 an awm mek a. Myanmar raltlan hi 33,764 an ni a, Bangladesh atanga rawn raltlan hi 2,014 awmin Manipur atanga sahimna zawnga awm mek hi 8,010 an ni. Hetih lai hian Mizorama raltlan awmte hi a changin an pung a, a changin an heu ve bawk.

FCS&CA-in raltlan tana buhfai sem tur an thlen tam zualte chu Champhai, Lawngtlai, Aizawl leh Siaha district te a ni a. Champhai district-ah hian quintal 4,533, Lawngtlai district-ah quintal 2,526, Aizawl district-ah quintal 2,458 leh kg. 40, Siaha district-ah quintal 1,875 te phurh thlen a ni a. Phurh thlen tlemna ber chu Khawzawl district niin quintal 46 chauh a thleng a, Serchhip district-ah quintal 119 leh Mamit district-ah quintal 184 te phurh thlen a ni bawk. Home department lamin ruahmanna an siam dan chuan raltlan pakhat zelin buhfai kg. 31.5 zela a thlawna sem phawt tur a ni ang.

<><><>

RS MP

Mizoram Rajya Sabha MP Pu K. Vanlalvena chuan Manipur buaina sosang zelah chief minister thlak mai a tawk tawh lova, president's rule puan a ngai a ni, a ti.

Akashvani Aizawl hnenah he thu hi sawiin Pu K. Vanlalvena chuan Manipur CM N. Biren Singh thlak ringawt ni lovin president's rule puan a, sorkar laipui-in sipai hmanga buaina a hmeh mih a ngai tawh a ni a ti a. Meitei leh tlangmi ralthuam kengte ralthuam neih zat chu Manipur Polic-te ralthuam ai-in a tam tawh zawk a ni, a ti a. Tunah chuan sorkar laipui-in sipai chakna thapui a hman tangkai a ngai tawh a ni a ti. Sorkar laipui aiawhte'n sipai venna hnuai-ah Meitei leh tlangmite awmna thliar felin an inkarah sipai dah a thisen a luan tawh lohna tura thawh a ngai niin MP chuan a sawi a. Meitei-te pualin inrelbawlina hrang din a, tlangmite tan sorkar hran din a ngai tawh niin a sawi bawk.

Hetih lai hian Mizoram Kohhran Hruaitute Committee (MKHC) chuan thuchhuah siamin tun hnai a Manipur a tharum thawhna avanga nunna hlu tak lak a awm leh ta chu pawl an tih thu an sawi a. Tharum thawhna leh buaina titawp tura inrawlh vat turin central sorkar an ngen. Manipur Jiribam district a tharum thawhna lo hluar leh ta leh biak-in engemawzat tihchhiat leh tihbawrhban a ni chu pawl an tih thu MKHC thuchhuah chuan a tarlang a. Mihring nunna inlaksak, biakin tihchhiat leh inrikrapna ang chi reng reng an duh loh thu leh sakhaw pakhat biakin bitum bik a awm thin chu tha an tih loh thu an sawi.

Mizoramah hnam hrang hrang an khawsa a, hetih lai a eng hnam bik emaw vau chu tha an tih loh thu MKHC chuan an sawi a. Manipur, a bikin Imphal phairuama Mizo awmte himna ngaihtuah turin thuneitute an ngen bawk a ni.

<><><>

VC/LC VOTERS

Tuna village council leh local council ding laite hun thla 6 vela pawh tawi a inthlanna buatsaih hma turin inpuahchahna kalpui mek a ni.

VC leh LC inthlanna buaipuitu state election commission chuan Zirtawpni khan VC leh LC draft electoral roll chu a tlangzarh a, VC leh LC electoral roll final publication hi nakum January ni 8 a tarchhuah tura ruahman a ni. State election commission thuneitute chuan VC leh LC inthlanna atana hman tur electoral roll hi assembly leh parliament inthlanna atana electoral roll ennawn nena ngaih pawlh loh tur a nih thu an sawi a. Naktuk atang hian electoral roll a awm lote'n thun an duh thu leh sawiselna awmte thehluh hun a intan ang a, He hun hi December ni 9 thleng hawn a ni ang. Claim and objection te hi December ni 20-ah chinfel tura ruahman a ni ang a, Nakum January ni 8-ah VC leh LC inthlanna lo awm tur atana electoral roll hman tur chu tlangzarh a ni dawn a ni.

VC leh LC hun hi kum 5 a ni a. Inthlan hnuhnung ber khan August ni 17, 2020-ah vote thlak a ni a. Covid hrilen vanglai a nih avangin LC 27 leh VC 8 te hemi ni hian vote an thlak thei lova, a hnu-ah erawh an inthlang ve

ta tho a ni. Tun hnai khan Local Administration department chuan hriattirna chhuahin tuna VC term hman mek hi nakum February ni 19 thleng chauh ni turin a puang a. Sorkar hian VC inthlan ruala LC inthlan a nih ve nghal theihna turin hriattirna a chhuah ve thuai dawn ni a thu dawn a ni.

<><><>

ABC

Mizoram Baptist Kohhran hnuai Area Baptist Council (ABC) Rorel leh Inkhawmpui Zirtawp zan atanga tan chu zanin hian a tiak ang.

Inkhawmpui hi ABC 17-ah buatsaih a ni a. Zirtawp zan atangin Inkhawmpui hi tanin, Inrinni nilengin ABC Rorelna atan hun hman a ni a, ABC Executive Committee thute bakah Pastor Bial atanga Agenda lut te, ABC kal tlanga Assembly 2025-a thlen tura chhawpchhuah te ngaihtuah a ni. ABC hrang hrangte thurel langsar zingah, BCM-in rampum huap ruihhlo do beihpui a kalpui mek chhunzawm rawtna te, ram pum huap environment humhalh beihpui rawtna te a tel a. Rampum huap awmni khama tawngtai rawtna te, Assembly thlengtun tanpuina pek leh tihpun rawtna te leh BCM-in rualbanlote tana hma an lakna, tun aia changtlung zawka kalpui rawtnate relin, ABC huam chhunga hmalakna tur leh budget ruahmante an thlir baw.

Vawin chawhma inkhawm ah kohhran upa nemnghehna neih ani a, chawhnu-ah Lalpa zanriah (Sacrament) an kilho a, ABC thenkhat-ah chuan Inrinni rorel lai hian kohhran nawlpui emaw thalai huapin emaw a seminar buatsaih an awm baw.

<><><>

ASF UPDATE

Vawiin khan a vawi 2-na atan vawk thi awm loh ni a thleng leh a, vawk damlo talh a awm loh ni vawi 3-na a ni baw.

ASF hrileng avanga nitina vawk thi zat chu a hniam chhoh zel laiin pun leh hlui chang a la awm leh thin a. Pathianni hmasa khan vawk thi a awm lova, tun hi vawk thi awm loh ni vawi 2-na a ni. Heti hian kumin February ni 9-a Champhai district Leithum khua a ASF vawk pulhri leng avanga vawk thi an chhinchhiah tan atang khan a vaiin vawk thi zat hi 14,741 a tling tawh a. Tun dinhmunah hian khaw 256 chu vawk pulhri lenna a puan mek a ni.

Vawiinah hian ASF natna vei vawk damlo talh a awm lo baw a. November ni 10 kha tun hnai a ni khata vawk damlo talh awm loh ni hmasa ber a ni a, November ni 15 khan vawk suat awm loh ni a thleng leh baw a. Heti hian kumin chhunga vawk pulhri a darh zel venna atana vawk damlo talh tawh zawng zawng chu 24,028 a tling tawh niin Vety department chuan an chhinchhiah a ni.

<><><>

MANN KI BAAT

Prime Minister Narendra Modi-a'n khawl thil thiam tak tak thalaite chu cyber inbumna thil laka kum lama upa zawkte venghimtu ni turin a ngen. He thu hi Akashvani-a Mann Ki Baat hun vawi 116-na, vawiina a hmannaah sawiin kum upaten bum an tawk nasa a, hetiang misualte laka anmahni venhim chu mitin mawhphurhna a ni, a ti.

Nakum, Swami Vivekananda pianchampha 162-na pualin Delhi-ah Viksit Bharat Young Leaders Dialogue buatsaih anih tur thu sawiin Dialogue-a tel tur hian thingtlang, block, district leh state hrang hrang atangin thalai sang 2 thlanchhuah an ni ang, a ti a, Swami Vivekananda pianchampha pualin kumtin Jan ni 2 hi Thalaite Ni-ah hman thin a ni.

Pu Modi-a chuan politics-a inhnawihna neilo chhungkua atanga chawr chhuak thalaite chu politics-a lut tura sawmin politics-a thalai nuai 1 seng lut turin thla reilote hnua-ah ram pumah beihpui thlak a ni ang, a ti.

<><><>